

# Scrabble 奧數比賽連奪多獎 香港學生揚威海外

晴報 發佈時間：2018/12/18

香港學生幾時都咁有才華，黛安近日又收到幾個喜訊！其中香港 Scrabble 代表隊上星期遠赴杜拜參加世界青年 Scrabble 大賽 (WESPA Youth Cup)，2 位循道中學同學羅朗然同布震和，喺 14 個國家嘅 116 位選手中脫穎而出，躋身全球頭 10 名。另外，香港數學奧林匹克學校今年派出嘅 4 支代表隊，亦分別喺保加利亞、新加坡及馬來西亞等地贏得唔少國際獎項，真正揚威海外呀！

黛安身邊唔少姊妹都好鍾意玩 Scrabble，考下自己嘅英文詞彙同應對能力，每年世青賽都吸引全球 18 歲以下玩家參與，今年香港 Scrabble 總會就派出 11 位本地中學生參加今個月 13 至 15 日舉行嘅賽事，最終羅朗然同布震和齊齊喺 24 回合嘅賽事中，撿到 16 場勝仗，分別排行第 6 同第 9 名！而年僅 13 歲、就讀中華基督教會蒙民偉書院嘅蕭鎮助同學，就勇奪「最佳進步獎」。

除咗英文叻，香港學生數學水平都好高，香港數學奧林匹克學校今年派出 4 支年齡介乎 8 至 15 歲嘅代表隊，分別遠赴保加利亞、新加坡、馬來西亞等地參加比賽，結果順利囊括多個個人同團體獎項。好似今年 7 月喺新加坡舉行嘅「第十四屆 IMC 國際數學競賽」，香港代表隊就足足撿走咗 8 金、9 銀及 6 銅嘅佳績，金獎得主更包括小一嘅方智彥、小二嘅曾曉洋、小三嘅殷皓陽、陳博瀚等人，其中陳博瀚同學更力壓同場選手，勇奪小三級全場總冠軍，之後又再喺上個月搞嘅「第五屆馬來西亞國際數學奧林匹克競賽」中，同另 2 名代表郝智榮同王奕諾，齊齊揮低多個參賽者，勇奪金獎，認真犀利！



▲港奧數代表隊的 4 名小四學生奪得 3 金 1 銀及兩項團體賽季軍

撰文：黛安 消息特靈八卦公關

欄名：八卦名利場

Source: <https://skypost.ulifestyle.com.hk/article/2232499/>